

SOALAN NO. 76

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : DATO' NORAINI BINTI AHMAD
[PARIT SULONG]**

TARIKH : 18 JUN 2014 (RABU)

SOALAN :

**Dato' Noraini binti Ahmad [Parit Sulong] minta MENTERI
PEMBANGUNAN WANITA, KELUARGA DAN MASYARAKAT**

menyatakan bagaimanakah sesuatu keputusan diambil dalam penarikan pemberian bantuan di bawah Exit Policy JKM dan jumlah yang dijangkakan dapat diagihkan kepada golongan sasaran yang lain untuk setiap tahun.

JAWAPAN:

Tuan Yang Dipertua,

Setiap permohonan bantuan akan disiasat dan diberi pertimbangan berdasarkan kelayakan dan bukan hak, tanpa mengira latar belakang kaum, agama, jantina dan fahaman politik. Proses pemberian bantuan kebajikan juga mengambil kira potensi yang ada pada setiap penerima bantuan yang masih produktif ke arah hidup berdikari.

Berdasarkan statistik tahun 2013 sebanyak 493,076 kes yang telah diluluskan. Manakala sebanyak 70,813 kes atau 14% daripada jumlah penerima bantuan kewangan bulanan Jabatan Kebajikan Masyarakat telah ditamatkan dengan penjimatan sebanyak RM18,660,850 dan jumlah yang sama ini dijangkakan dapat diagihkan kepada golongan sasar yang lain.

Berikut adalah antara faktor-faktor yang menyebabkan bantuan kebajikan ditamatkan bantuan:

- i. Peningkatan tahap sosio ekonomi serta mampu berdikari;

- ii. Penerima bantuan meninggal dunia;
- iii. Penerima kini tinggal bersama anak yang mampu menanggung perbelanjaan keluarga;
- iv. Bagi skim Bantuan Kanak-Kanak, anak terbabit telah melepasi umur 18 tahun;
- v. Bagi skim Elaun Pekerja Cacat, pendapatan OKU tersebut telah melebihi RM1,200 sebulan

Pemakluman mengenai penamatan bantuan kebajikan akan dibuat melalui 'Bulk SMS' dan penyampaian surat kepada penerima yang dihantar melalui pos.

Secara amnya, bantuan kebajikan yang diberikan adalah bersifat sementara bagi membantu meringankan beban kumpulan sasar yang memerlukan meneruskan kelangsungan hidup.

SOALAN (77)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

TARIKH : 18 JUN 2014 (RABU)

**DARIPADA : Y.B. TUAN SIM TONG HIM
[KOTA MELAKA]**

SOALAN :-

Y.B. TUAN SIM TONG HIM [KOTA MELAKA] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan :-

- (a) tentang syarat dan prosedur untuk penyerahan tapak tanah untuk tujuan menjadikan " Tanah Kawasan Lapang " oleh pemaju perumahan dan adakah tanah ini akan jadi tanah kerajaan negeri; dan
- (b) apakah jenis kegunaan boleh dijalankan diatas " Tanah Kawasan Lapang " ini dan bolehkah tanah ini ditukar milik kepada individu.

JAWAPAN :-

Tuan Yang di-Pertua,

Untuk makluman Ahli Yang Berhormat, Kementerian Kesejahteraan Bandar, Perumahan dan Kerajaan Tempatan (KPKT) melalui Jabatan Perancangan Bandar dan Desa (JPBD) Semenanjung Malaysia sentiasa komited dalam memastikan setiap perancangan dan pembangunan yang telah dirancang hendaklah kondusif, menarik, mampan dan selesa. Penyediaan tanah lapang awam yang mencukupi mampu merealisasikan hasrat KPKT tersebut terutama di kawasan perbandaran.

Syarat dan prosedur untuk penyerahan tapak tanah untuk tujuan menjadikan tanah kawasan lapang berpandukan dasar sedia ada berkaitan perancangan dan penyediaan tanah lapang awam adalah :

- i. Skim-skim pembangunan tanah perlu memperuntukkan sekurang-kurangnya 10 peratus daripada keluasan kawasan pembangunan sebagai tanah lapang awam. Berdasarkan pemantauan yang dijalankan oleh KPKT melalui JPBD, semua negeri-negeri di Semenanjung Malaysia telah melaksanakan dasar ini; dan
- ii. Semua tanah lapang yang ditetapkan di dalam pelan susun atur pembangunan yang telah diluluskan oleh pihak berkuasa perancang tempatan (PBPT) perlu diserahkan kepada Pihak Berkuasa Negeri dan diwartakan mengikut peruntukan seksyen 62, Kanun Tanah Negara (KTN).

Jenis kegunaan yang boleh dijalankan diatas tanah kawasan lapang adalah seperti berikut :

- i. Penyediaan tanah lapang awam mampu berfungsi sebagai kawasan rekreasi dan interaksi sosial dalam melahirkan rakyat yang muhibbah, harmoni, bersatu padu dan sihat sejahtera.

Justeru, kepentingan penyediaan tanah lapang awam dalam pembangunan negara perlu diberi penekanan yang sewajarnya agar pembangunan fizikal negara dapat diimbangi dengan pembangunan yang indah, berkualiti dan beridentiti;

- ii. Mampu berfungsi sebagai zon pemisah/kawasan mitigasi bencana semulajadi, sebagai kolam bagi pengawalan banjir dan zon penampungan bagi kejadian tanah runtuh; dan
- iii. Mewujudkan suasana kehijauan dan keindahan di kawasan pembangunan.

Mengikut dasar sediaada berkaitan perancangan dan penyediaan tapak kawasan lapang :

- i. Pihak Berkuasa Negeri perlu mengambil langkah-langkah segera bagi merizab dan mewartakan tanah lapang awam yang dicadangkan di dalam cadangan pemajuan mengikut

peruntukan seksyen 62, KTN dan tidak boleh diserahkan untuk pemilikan individu; dan

- ii. Rizab-rizab tanah lapang awam sedia ada perlu dikekalkan dan tidak boleh dibangunkan untuk tujuan kemudahan awam lain atau untuk kegunaan pembangunan guna tanah lain selaras dengan keputusan Majlis Perancang Fizikal Negara Bil. 5/2005.

KPKT melalui JPBD komited dalam mencapai sasaran menyediakan 2 hektar kawasan lapang bagi setiap 1,000 penduduk bandar selaras dengan usaha untuk mencapai status negara maju menjelang tahun 2020 seperti mana yang dinyatakan dalam Dasar Perbandaran Negara (Dasar DPN 9, Langkah ii).

Kementerian Kesejahteraan Bandar,
Perumahan dan Kerajaan Tempatan

Jun 2014